



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tir_yimym



tir yimym

TAPAK 7



Russia den “energy ceasefire” ka atema Ukraine renema lir: Zelenskyy

Russia-i Ukraine indang industry balala amak; nisung 4 tepsetogo



₹ 5.00

VOL. XXIII ISSUE NO. 344 (ADOK 344) DIMAPUR YANGTEPNÜ (THURSDAY) RONGJUI (SEPTEMBER) 24, 2026 ` 5.00

Governor Yadav-i NSSB ketdangsürtem ajurupet

Dimapur, September 23, 2026 (TYO): Nagaland Governor Nand Kishore Yadav-i September 23, 2026 nü Lok Bhavan, Kohima nung Nagaland Staff Selection Board (NSSB) ketdangsürtem den senden ka menogo.

Senden nung NSSB ketdangsürtemi board tentetba, tashi, inyaksangshi, recruitment framework, inyaktetbatem, tayongzükbatem ajuruba aser tarutsü sentongtem lemsatep.

NSSB ya July 31, 2020 nü tentet aser August 25, 2022 nungi mapa inyaksü tenzüka liasü. NSSB ajanga Nagaland sorkar nung Pay Matrix Levels 3 nungi 7 kübok Grade III posts atema centralised recruitment examinations ketdangsüa agir.

NSSB-i centralised aser standardised recruitment maparen inyakba, digitization aser tashishitsü melii inyakba indang ketdangsürtemi lemsatep.

NSSB tentetba sülen nungi advertised posts 1,734 ateam tatidangtem agiogo, interview atema candidate 4,232 jaok aser candidates 1,511 shimetogo ta ketdangsürtemisa ashi.

Parnokisa Governor Yadav dang service rules aser eligibility conditions meputep aser metokmeperi aliba tebilemstü lemsatep.

NSSB asoshi technological upgradation aser data security teti alitsüla, office space tesadem alitsüla aser examination materials ayutsü atema facility tajungtem nüngdaker ta ketdangsürtemisa ashi.

NSSB-isa Governor Yadav dang recruitment data repository akangshitsü, paperless recruitment ecosystem tenzüksü, cybersecurity aser data protection tajungba akümtsü aser staff capacity building o training asütsü sentongtem aliba metetdaksü.

Kuda B nung kitsükkirong lendong atalok



Dimapur, September 23, 2026 (TYO): Bodbarnü anüngdang Dimapur kübok Kuda village Lane 10A nung kitsükkirong lendong tulu ka ataloka kibong 100 shi talidak maka kumogo.

Ajisüaka iba lendong nung nisung asüba mesüra yiruyibong asüba osang kecha mali.

Iba lendong ya electrical short circuit ka ajanga adok asütsü akok ta temulung melemini bilemer saka iba kuli ano mangu lir ta Fire department ketdangsür kati ashi.

Bodbar nikongdang 2:20 ako meta Central Fire Station-i lendong atalokba angashi.

Iba tesem nung Bihari nunger teimba alir aser parnok anogoshia aayangertem aser autorickshaw driver teimba lir ta ketdangsürisa shisem.

Iba lendong nung autorickshaws 10 shi rongdokba osang angazüker.

Mi enseptsü atema fire tenders tenet tashi amshia yaritep aser ghonda ana shi ka nung mi ensepeta liasü.

Ao Senden-i NSCN(IM) tanishir 2 nem anogo 15 züngzüksür

Dimapur, September 23, 2026 (TYO): Ao Senden-i NSCN(IM) tanishir ana nem anogo 15 tsüngda tenati Dr. S.C. Jamir anema jembiba olen meyipa agitsü mapang züngzüksüogo.

September 16, 2026 nü V.S. Atem, Deputy Ato Kilonser NSCN (IM)-i "Dr. S.C. Jamir ya ozüangi melaba aser tashi agütsüba nisung ka masü, pa odang asatenerba dang lir" ta ashiba aser R.H. Raising, Member Steering Committee NCSN (IM)-i "Dr. S.C. Jamir ya Naga nunger atema jembitsür ka masü, pai Naga

nunger tebilemstü onük atema jembitsü temeten mali" ta ashiba khukhua aitsür ta Ao Senden-i Bodbarnü sangdong ka nung ashi.

Naga nunger indang nükjidong kaji asenok sasa ketdangsüa aotsüba mangdang lir aser Naga nungeri iba ya aginür. Naga yimtenren mapa inyaka arudang tangatetba balala lir aser Naga nunger sasa telemsa adokogo. Ajisüaka iba yagi Naga yimten tebilemstü ya kija ka, nisung kar adenba telok mesüra telungpur ka meyong masü ta Ao

Senden-i ashi.

Naga yimtenren tensa meteta alir Naga senso mashii kati jembitsü akok aser yimtenren mapa anendaka aliba tejakleni anir aotsü atema pa tebilemba lemsateptsü akok. Anungji NSCN(IM) tanishir anati Naga nunger taginüba nung ajemdaker züngzüksüba mapang tsüngda tenati jembiba meyipa agitsü metetdaksür, aji ta mesüra Ao Senden-i teinyaksü inyaka aotsü ta Tir Marsanen Imsong aser Tongti Tezülur Imtipokym nati sangdong nung shiogo.

Local Arrangement Committee-i senden ayonger

Dimapur, September 23, 2026 (TYO): London nung yua aliba alemli Naga nunger tasü mang bener arutsü atema iba senden ayongzüka amentsü ta LAC nung züngsemtem-Western Sümi Hoho (WSH) President Tokuho Suhoi Neho aser Eastern Nagaland People's Union Dimapur (ENPUD) President N.T. Thamlong

Phom nati sangdong ka nung ashi.

Naga ancestral human remains kidangi bener aruba nung kin lenisüba aser lokti tentettem amalitepa, longjema aser akhüm agüja inyaksü nükjidong nung iba senden ayonger ta tenatisa ashi.

Ao Senso Telongiem Dimapur (ASTD) President aser

ketdangpurtem dena kin lennirtem dangi senden nung adentsü shiditem yokogo ta tenatisa ashi.

Iba senden ya September 29, 2026 nikongdang 3:00 ako nung Western Sümi Hoho Office, Chekiye Village, Dimapur nung amentsü ta Local Arrangement Committee (LAC)-isa metetdaksüogo.

Meghalaya nung UDP MLA 8 BJP nung aden

Guwahati, September 23, 2026 (Agencies): Meghalaya nungi United Democratic Party (UDP) MLA 8-i Bharatiya Janata Party (BJP) nung denogo.

September 23, 2026 nü New Delhi nung aliba BJP party headquarters nung UDP MLA temi BJP nung aden.

Meghalaya Legislative Assembly nung UDP MLA 12 aliba nungi parnok 8 BJP nung adener.

BJP central leadership-i Constitution nung Eighth Schedule nung Khasi language dendaktsütsü, coal-mining restrictions melenshitsü aser Meghalaya Residents Safety and Security Act (MRSSA) mapa tenzüksü mulunga agizükra parnoki BJP nung adentsü ta UDP MLA temi ashiba sülen anogo ishika lir parnok BJP züngsemtem kumogo.

BJP national spokesperson Sambit Patra-i party headquarters nung UDP MLA tem BJP nung adenba osang metetdaksü. Iba sentong nung Union Minister Kiren Rijiju dena liasü.

UDP MLA 8 senteper BJP lenisüba den jembia aru. Centre nungi telangzüba anguba sülen parnoki BJP nung adentsü lemtet agitsü ta Mawsynram MLA Olan Sing Suin-i tesüiba nung shia liasü.

UDP MLA temisa Them Iew Mawlong, Shillong nungi Harijan Colony belentsü tebilemstü lemsatep.

Züngsem 60 agi akümba Meghalaya Assembly nung UDP

MLA 12 lir aser National People's Party (NPP)-i aniba sorkar nung yariteper.

UDP-i Central Executive Committee jazüka senden ka amen aser parnoki ashiba agi MLA 8 prongji UDP züngsemtem liasü.

Union Home Minister Amit Shah-i MLA 8 anioktsü tatem telemtetba agi ta BJP lennir tejen Alexander Laloo Hek-i ashi.

Meghalaya Assembly nung BJP MLA 2 liasü saka UDP MLA tem züngsema parnok 10 kumogo.

Meghalaya nungi MLA 8 BJP nung adenba pelashishia agizüker. Narendra Modi sorkari Northeast nung terenlok otsü tajung yangluba ajanga parnok BJP nung adentsü lemtetogo. Parnok ya BJP-i aniba sorkar mapa tajung ngua ajungmeso lir ta Rijiju-i ashi.

Meghalaya sorkar nung NPP sülen UDP züngsem 12 ya second-largest constituent liasü. Ajisüaka parnoki BJP nung adenba ajanga Assembly nung temelenshi tulu ka adokba dang masü saka 2028 Meghalaya Assembly election jakdang yimtenren wadang tsütsü temelenshi ka ajuruogo.

UDP-i MLA 3 anentsür

Külen, UDP-i Bodbarnü parnok MLA asem- Kyrmen Shylla, Ollan Singh Suin aser Matthew Beyondstar Kurbah anentsüogo.

Parnoki Bharatiya Janata Party (BJP) nung adentsü lemtetba osang metetdaksüba sülen UDP-i par asem anentsü.

"Party-i MLA asem nem show-cause notices agütsü aser State Parliamentary Board tsüngdangi arutsü mesüra tezüluba nung telangzüba agütsütsü maongka agütsüogo" ta UDP president Metbah Lyngdoh-i ashi.

Ajisüaka, par asemini mapang züngzüksüba tsüngda telangzüba kecha magütsü. Anungji party-i UDP züngsem asem tanga tetuyubatem magütsü tashi anenja atatsü lemtetogo" ta Lyngdoh-isa ashi.

Bodbarnü BJP nung adenba UDP MLA 8 rongnung par asem dena lir. Tanüngba MLA temji-Lahkmen Rymbui, Balajied Kupa Synrem, Synshar Kupa Roy Lyngdoh Thabah, Pius Marwein aser Mayralborn Syiem nunger lir.

UDP MLA 8-i BJP nung adenba ajanga NPP-i aniba Meghalaya Democratic Alliance (MDA) sorkar nung temelenshi kecha malitsü ta Meghalaya Chief Minister Conrad K Sangma-i osangbener dang ashi.

"Iba ya MLA kijatemi lemtetba lir. Anungji ni iba nung tashitsü kecha mali" CM Conrad-i ashi.

"Sorkar teloktep tashi kasa dang lir kechiyong teloktep sasep nung dang party melentepogo. Assembly nung onok nüba teimba lir aser ajak kasa dang asütsü" ta paisa ashi.

BJP-i ministerial menden meshi asü koda ta asüngdangdang "masü, parnoki kecha memeshi" ta Conrad-isa langzü.

Kohima nung NSBB consultant workshop tenzükogo



Kohima nung NSBB consultant workshop aliba mapang tangokba noska angur.

Dimapur, Rongjui/Sept. 23 (TYO): Nagaland State Biodiversity Strategy ajanga TNCC & FES den lungjemer ayongzükba Revision of Nagaland State Biodiversity Strategy and Action plan indang anogo ana workshop Hotel Japfü, Kohima nung September 23, 2026 nü tenzükogo aser September 24, 2026 nü tembangtsü.

Principal Secretary, DEFCC, Chairman NSBB and Development Commissioner, Y. Kikheto Sema, IAS-i iba sentong tenzükba jembidang, state indang biodiversity wazüka ayutsü aser ajungkettsü atema asenoki C's pezü nungi tenzüksüla - Cooperation, Coordination, Confidence, and Contribution - ta ashi.

Tsüngremi ajak yanglu aser aji shidak amshitsü aser anepalutsü atema meimchir nem khuret nungloksü, ta pai ashi.

Takum yaritsü aser chiyongtsü agütsütsü atema Tsüngremi yangluba biodiversity ya anepalutsüla aser kumzükba ayutsüla, ta ashi. Nagaland tia taka biodiversity tsütsü takar aser arem ya national average dang tuluba lir, anungji asenoki

aji wazüka ayutsüla, ta Sema-i ashi.

Nagaland nung aluyimba yimya ya tekong lu timba lir, saka asenok aluyimba yimya ya India nung aliba university indang curriculum kecha nunga maka. Asen nübür shilem 70 shi yimdak-yimtsüngtem nung alir aser parnoki alu ayimer. Industries tulu mesüra teyari amenoktsü nükla ajema lir, anungji agro and allied activities ya dang teimla lir. Asen state tzüngsang-mopung ya alu yimtetsüsa lir, aser linük nung dragon fruit nungi kiwi tashi züsentsü akokba states ishika aliba nung Nagaland dena lir, ta pai ashi.

Tangar ama asenok ali rongsen peria mali, saka asenok biodiversity takar asünung asenoki asen tembartem dang asen limai arua ecological services agitsü ajungshitsüla, ta ashi.

Pai iba sentong nung adenertem dang biodiversity tsütsü tayongzükba, maongka indang kanga junga jembitsü aser tarutsü nung mera agia aotsü asoshi kanga junga lateta ayutsü ayongzükba liasü.

Kikheto-isa biodiversity nungya jana ketdangsüba, solid

& liquid waste ketdangsüba dena lir aser iba ya Sustainable Development Goal nunga densema lir, anungji nüburtem nem awareness agütsütsü nungdaker, ta shia liasü.

Biodiversity aser jana ketdangsüba onük ya kibong nunga jembitsüla, school education indang curriculum nunga alitsüla, arogo temi Sunday School curriculum nunga inoka tanurtem dang sayu nunga ajungtsü, ta Development Commissioner, Y. Kikheto Sema-i ashi.

Iba consultation workshop tenzükba sentong nung CCF (D&P) & Member Secretary, NSBB Sidramappa M Chalkapure, IFS menden liasü, Evg. Menuotuolie Chielie, Koinonia Baptist Church ajanga sarasadem.

Executive Director, TNCC, India Dr. Ishwar Narayanan aser General Manager, FES Sanjay Sharma, APCCF (Territorial), O/o PCCF natia o tatsütsü jembia.

HOFF Spongngukshi, IFS-i iba workshop ayongzükba nükjidong lemsatop aser RFO, i/c Chiephobozou Range and NSBB, Savinuo Kikhi-i melepzüng o jembia liasü

Dimapur DPDB senden nung hostels, Unions aser Associations indang jembia

Dimapur, Rongjui/Sept. 23

(TYO): Ita shia amenba District Planning & Development Board (DPDB), Dimapur senden Deputy Commissioner, Dimapur indang Conference Hall, Dimapur nung September 23, 2026 nü mena liasü. Iba senden nung Advisor, Industries & Commerce, Hekani Jakhalu Kense menden liasü aser Deputy Commissioner & Vice Chairman, DPDB, Dimapur Dr. Tinojongshi Chang-i anir senden amen.

Dimapur temürekba aser tajungba kumdaksütsü atema sanitation nung sorkar indang department tem, urban local bodies aser nüburtem lungjemer mera agitsü onük iba senden nung jembia liasü.

District nung source nung jana bensaba ya shilem 10 majung, anungji DPDB züngsem temi departmental sentong aser yimtsüng nung sentong balala agidang sanitation awareness agütsütsü ayongzükba liasü.

Senden nung Dimapur kübok kaketshir indang nija hostels tem lapoka aliba verification aser registration agia semdangtsü indang onük benoka jembia.

Naga Council Dimapur kübok vigilance committee ka tenteta asadanger tebilemba lemsatopba nung ajemdaker iba onük ya jembia liasü. Nija hostels kar nung operational guidelines tejangja maliba, kaketshirtem tenokdangba makai senzüsempomga aser compound ka nung tetsür aser teburtem külemi aliba indang committee-i bushiteta liasü.

Nija indang hostels lapoka amshiba azüoktsü atema School Education Department kübok tangbo ozüng tejangja mali, ta District Education Officer (DEO) ajanga metetdaksü. Field verification oa applications agizüker aser No Objection Certificates agütsür, saka records anepalutsü mesüra mapang shia hostels tem semdangtsü asoshi inyakyim tejangja mali.

Department-i Principal Director, School Education dangi nija hostels tem amenoktsü atema ozüng yanglutsü shia zülüogo, ta DEO-

i ashi.

Board züngsem temi nija hostels tem nung safety, supervision, hygiene shidak maliba aser outdoor facilities peria maliba tebilemtsü lemsatopa liasü. Aiben tsürabortemi kaketshir anepalutsü atema hostel operators aser tesayur nem nungloksür, anungji guidelines tajung alitsü nungdaker ta jembia liasü.

Guidelines shidak yanglutsü atema State level nung tim department dangi onük abentsü lemteta liasü.

Board-i business tilatem aser nübür tejangraba kumzükba ayutsü mechi registration magidang unions, societies aser welfare organizations tem verification shidak agitsü nungdakba indang jembia.

Lokti tentet aikati Society Registration Act kübok nungdakba ama inyaker saka karbo parnok nükjidong alema oa inyakba lir, koba ajanga businesses aser nüburtem dak kongshir ta jembia liasü. Applications aika verification asütsü anendaka lir. Aser itemji registration atema meyokdang field verification aor, ta ashi.

Züngsem temi tesem balala nung lokti tentet jateta adokba aser businesses dang fees meshiba tebilemtsü lemsatop aser ozüng tesashiba yanglutsü nungdaker ta jembia liasü.

Registered societies temi mapang shia renewal aser verification asütsü nungdakba indanga Board nung jembia liasü. Parnoki iba onük ya Home Department dangi yoktsü telemtetba agia liasü.

Senden nung District Tuberculosis Officer, Dimapur ajanga TB Mukta Bharat indang PowerPoint presentation agüja liasü.

Government of India-i MARCOFED (Nagaland State Cooperative Marketing and Consumers' Federation Ltd.) ajanga Price Stabilization Fund drive nung shilem ka ama National Cooperative Consumers Federation (NCCF) aser NAFED den teka amteper

Dimapur nung onions seret nung senpak 35 agi ayoker, anungji nüburtemi iba maongka agitsüla, ta DC-isa metetdaksü.

Kohima nung State-Level VPD Surveillance Transition training agütsür



Dimapur, Rongjui/Sept. 23 (TYO): Department of Health & Family Welfare, Government of Nagaland ajanga State-Level Vaccine Preventable Disease (VPD) Surveillance Transition Training ka Hotel Vivor, Kohima nung September 23, 2026 nü tenzüksüogo.

Anogo asem training ya September 25 nü tembangtsü aser ibai NCDC aser WHO India den lungjemer State IDSP Division teyari nung ayongzük. Iba training nungya district Immunization and Surveillance ketdangsürtem, data managers aser data entry operators tem lungjemdakja VPD surveillance tashi itshidaksütsü aser Integrated Disease Surveillance Programme (IDSP) den lungjemba nung yaritsü.

Iba training tenzükba sentong nung Principal

Director, Health & Family Welfare, Dr. Keveduyi Theyo-i jembidang sorkar meyong disease surveillance tashi itshitsü asoshi mera agia melenshitsü, unified surveillance system ka yanglutsü tongtipang lir ta ashi.

Mapang shidak nung osang agütsüba, quality data, specimen collection aser laboratory linkages tem shidak amshitsü nungdaker ta pai ashi. "IDSP-NCDC network nung VPD surveillance loktepba ya 'One India, One Surveillance' architecture asoshi mangdang akaba mera ka lir," ta pai ashi.

Commissioner & Secretary, Health & Family Welfare, Kevileno Angami-i iba training ayongzükba nükjidong lemsatopdang, yakta puteta bushisüngdangtsü aser vaccine agi nokdangtetba tashidak asoshi telangzüba agütsütsü

atema immunization aser surveillance ya külemi inyaksüla, ta ashi.

Lai-a mapang shidak nung surveillance data shidak renema ayutsü tongtipang lir ta ashi.

"Asenoki VPD surveillance, immunization services, laboratory systems aser outbreak response tsüngta tesendaktep tashi itshitsüla. Iba yagi surveillance ya reporting exercise nungi public health action system kumdaksütsü," ta lai ashi.

Dr. Nyanthung Kikon, SNO, IDSP ajanga pela agizükba o jembia aser VPD surveillance and transition process indang Dr. Imkongtemsu Longchar, SIO, UIP ajanga rateta ashi. Dr. Nounengulie Kire, Public Health Specialist, DHFW ajanga melepzüng o jembia iba sentong tembang.

Kohima nung Sept. 25 nü Job Fair ayongzüksü

Dimapur, Rongjui/Sept. 23 (TYO): Mapa bushir aser mapa agütsürtem ajurutebpa nung yaritsü aser employment maongka agütsütsü atema Job Fair ka Regional Employment Exchange, Kohima nung September 25, 2026 anepdang 10:00 ako nungi nikongdang 2:00 ako tashi ayongzükba agitsü.

Iba Job Fair ya Regional Employment Exchange, Kohima ajanga National Career Service Centre for SC/ST, Kohima; Differently Abled, Dimapur; aser Don Bosco Placement Network, Dimapur den lungjemer ayongzüksü.

Iba sentong nungya Jio, Talent

Acquaintant, Chilli Breeze, Mahindra Apex Motor, Dimapur aser tangartem shilem agitsü.

Iba sentong ajanga temsüa aliba mapa bushirtem indang-indanga recruiting agencies den sensaksemtettsü, vacancies aliba indang angazüksü aser sector balala nung mapa inyaksü aliba maongka bushitsü.

Iba sentong nung Class 10 pass sür alirtem aser temaba zünger alirtemi shilem agitettsü. Regional Employment Officer, Kohima, T. Yimlikhumzuk-i mapa bushirtem dang iba sentong nung shilem agitsü ayongzük.



September 23, 2026 nü New York nung 81buba United Nations General Assembly aliba mapang nung External Affairs Minister, S Jaishankar aser Nepal Foreign Minister, Shisir Khanal na jurila senden ka amendang tangokba noksa nung angur.

Opposition lenirtemi election agishitsü takhangba agütsür

New Delhi, Rongjui/September 23 (Agencies): Bodhbarnü RJD lenir Tejashwi Yadav-i, BJP tajangzük ngudaktsütsü atema Election Commission tim mesüi amshir aser opposition tashi meitdaktsütsü atema election temzüngtem melenshir, ta metetdaktsü.

Osangbenertem senden ka nung Tejashwi-i, Bihar aser West Bengal na nung assembly election agishitsü atema takhangba agütsüba den külemi chief election commissioner Gyanesh Kumar menden nungi agientsü atema takhangba agütsü.

"Bihar nung süaka mesüra Maharashtra, Delhi, Haryana aser Bengal nung süaka opposition-i tamakok mangu. Ajisüaka item state tem nung BJP takok ngudaktsütsü atema EC tim mesüi amshi," ta paisa metetdaktsü.

Paisa, Ato kilonser Narendra Modi aser Union Home Minister Amit Shah nati temzüng ajak mezüngshir aser CEC-i parnok taginüba ama inyaker, ta metetdaktsü.

"Iba inyakyim ya maneni benshidar. State aika nung tang tashi benshidar. Election Commissioners anatia ashishiogo. Ajisüaka Modi mesüra Amit Shah napronglai iba atema kecha mejembir," ta pai metetdaktsü.

CEC shimba dak sendakba nung Tejashwi-i, "Tamalenbo CEC shimba luden nung Chief Justice of India densema liasü, ajisüaka tangbo iba luden nung Union Minister ka züngoker.

Iba tetezü Modi taginüba ama Gyanesh ka agientsüa akok, saka BJP-i ano tanga Gyanesh Kumar ka anioktsü akok," ta metetdaktsü.

DMK tongti aser taoba mapang Tamil Nadu chief minister MK Stalin-ia CEC Gyanesh Kumar menden nungi agientsü takhangba agütsü.

Stalin-i, "DMK den tanga opposition party temi SIR exercise kübok electoral roll nungi voters agiena aliba anema nokdaka liasü. State balala nung election jakdang ita aika jelia iba mapatong benoka inyaker, aser talisa West Bengal nung inyakyim meshidaki liasü," ta ashi.

Paisa, election commissioners- Sukhbir Singh Sandhu aser Vivek Joshi nati SIR dak sendakba telemtetbatem ashishia liasü, aser ibaji ajanga züngsem asem aliba tentet (EC) inyakyim ashishitsüa akümer, ta metetdaktsü.

Paisa, election commissioners anati tongtibang telemtetbatem indang memeteti liasü aser ita 10 tsünga tenati ashishiba 14 ben magizüki liasü, ta ashi.

Stalin-i, "Gyanesh Kumar tangsa anentsütsüla aser SIR exercise ya anentsüla," ta ashi.

Paisa Election Commission inyakyim ya jungjunga bushisüngdangtsüla, ta ashi.

Taoba mapang West Bengal chief minister Mamata Banerjee-ia, election commission tim mesüi amshiogo, ta shia Gyanesh Kumar anema inyaksüla, ta

takhangba agütsü.

"Iba ya tashishitsü otsü ka lir. Onok akümüli mapang nung iba ama ya kodanga mengudang. Election commissioner aputsüla. Pa maneni inyaksü temsüa mali. BJP-i linük temzüng meraksatsütetstü. Parnoki democracy meraksatsütetstü," ta lai ashi.

Mamata-i, "Gyanesh Kumar-i tim masüba nung Police amshi aser BJP den senteper parnok BJP pusemertem nem mapa lemezütsü," ta ashi.

Samajwadi Party tongti, Akhilesh Yadav-ia, election commissioner anati tashishiba agütsüba ajanga tebilemtstü akar, ta ashi.

Paisa, "Iba ya democracy atema lendong. Iba ya asen democracy tashi meitdaktsütsü atema merangba lir," ta metetdaktsü.

Lucknow nung osangbenertem den jembidang Yadav-i, "Election Commission ya election nung tongtibangtiba reju ta züngshir. Iba tentet ya tejak mereprangi inyakra tentet ka asütsü onoki imlar. Tejak mereprangi inyakra tentet kati democracy tashi itdaksütsü onoki amanger," ta metetdaktsü.

"Iba tetezü iba mapang nung tentetba sorkartembo temzüng kübok shimba sorkar masü," ta taoba mapang UP chief Minister Yadav-isa metetdaktsü.

Yadav-i X ajanga, election commissioner anati tashishiba benokbaji süoki ia agitsü osang ka lir, ta shia Supreme Court-i tim teinyaktsü inyaksüla, ta mepishi.

PM Modi-i December ita nung Canada semdangtsü

New Delhi, September 23 (Agencies): India aser Canada na tsünga shishilembaba tezüngzüktep agitsü atema taküm December ita nung Ato kilonser Narendra Modi-i Canada semdangtsü, ta Canada Ato kilonser Mark Carney-i metetdaktsü.

New York nung UN General Assembly aliba mapang osangbenertem den jembidang Canada Ato kilonser Carney-i, India aser Canada na tsünga tesendaktep alitsüji kanga tongtibang; taküm küm tatembanglen tashi nungbo linük anati shishilembaba tezüngzüktep agitsü tebilemba lir, ta metetdaktsü.

"India den shishilembaba tezüngzüktep agitsü atema maparen junga odor, iba tesendaktep ya kanga tongtibang. Nüburtem tsünga tesendaktep, security, shishilembaba aser rongsenkettzüng tesendaktep-a tongtibang," ta pai ashi.

"Iba mapang nungji pai (Ato

kilonser Modi) Canada semdangtsü. Pa agizüktsü atema ni yongyaa atar," ta paisa metetdaktsü.

Tamalen Union Commerce Minister Piyush Goyal-ia, rongsenkettzüng tsütsü partnership atema kera inyaksangshitsü atema India aser Canada nati bangjemogo aser taruba sendenji October 5 nungi tenzüksü, ta metetdakja liasü.

Goyal-i, taoba hopta Mumbai nung Canada International trade minister Maninder Sidhu den pezübenbuba senden menogo, ta metetdaktsü.

2022 küm March ita nungi tenzüka linük anati Early Progress Trade Agreement atema ken o jembia tenzüka liasü, ajisüaka 2023 küm August ita nung linük ana tsünga tesendaktep raksaba agi mapang tatsüka ken o jembiba anena liasü aser yaküm G20 senden mapang nungji linük anati asentenshir ken o jembir.

Odisha kübok district pezü nung nisung 5,000 dak tali aienshidaktsüogo

New Delhi, September 23 (Agencies): Bodhbarnüa southern Odisha nung tzünglu maneni aru aser Bay of Bengal nungi yipru tesashi kati Andhra Pradesh-Odisha tzüymkümlen kongshitsü lia district pezü nungi nisung 5,000 dak tali aienshidaktsüogo.

Gajapati District collector Akshay Sunil Agarwal-i, mashisa tetsütem, tantsür-tamburtem aser tanurtem tesem aika nungi aienshidakja cyclone shelters aser relief camps nung jenokdaktsüogo aser ketdangsertemi parnok nem chiyungtsü agütsüdar, ta metetdaktsü.

Mongolbar nungi tenzüka Odisha tesem aika nung tzünglu maneni arur aser Korapur kübok Semiliguda nungbo ghonda 24 (Bodhbarnep 8:30 tashi nung) tsünga tzünglu 230mm aruogo, ta ketdangsertemi metetdaktsü.

Korapur kübok Jeypore nunga tzünglu 161mm aruogo, ta Bodhbarnü India Meteorological Department nungi ketdangser kati metetdaktsü.

IMD-i, Bodhbarnep yipruji ghonda ka nung kilometer 5 kera liasü aser anepdang 8:30 nung yipruji Andhra Pradesh kübok Kalingapatnam nungi

kilometer 60, Visakhapatnam nungi kilometer 140 aser Puri nungi kilometer 240 pilar liasü.

Iba yipru ajanga district aika nung tzünglu arua süngdong aika laor, ki aika chireper aser Ganjam, Gajapati, Malkangiri, Koraput, Rayagada aser Nabarangpur nung tzümetsüng lir.

Hokolbar aser Honibarnüa state tesem aika nung tzünglu sashia arutsü.

Ketdangsertemi Kalahandi, Koraput, Malkangiri aser Nabarangpur district tem nung 'red alert' sangdongogo aser tzüymkümlen aliba region aika nung 'orange alert' sangdongogo.

Iba yipru dak sendakba nung state sorkari tesem balala nung Odisha Disaster Rapid Action Force (ODRAF) team 33 lemezükja lir.

State sorkarisa district 10 nungbo shisaliok rejutem aser Anganwadi centres shibangtsü tuyuba den külemi tang tensa nung ajemdaker state sorkar mapa inyaktertem 'leave' ajak thinentsüogo.

Hospital ketdangsertem danga mozü-kidang mozü peria ayutsü tuyuba den külemi mashisa tetsütem anasa aliba community health centres (CHCs)-i anir oang, ta tuyuogo.



September 23, 2026 nü New Delhi nung taoba mapang Delhi chief minister, Arvind Kejriwal, AAP MP Sanjay Singh aser Delhi AAP Tir, Saurabh Bharadwaj nungeri osangbenertem den jembidang tangokba noksa nung angur. Bodhbarnü Kejriwal-i SIR exercise thinentsüla aser Chief Election Commissioner (CEC), Gyanesh Kumar tangsa aputsüla, ta takhangba agütsü.

File No.K-15017/01/2026-Trg.Part (397022)
Government of India
Department of Rural Development
(Training Division)
Kavtavya Bhawan-3, New Delhi-110001

Mapa nung shimba sangdong

Iba Ministry-i National Institute of Rural Development & Panchayati Raj (NIRD&PR), Hyderabad nung deputation basis nung Deputy Director General menden atema application meshiogo, Pay Band ji Rs 37400-67000 aser Grade Pay Rs. 10000/- (6th CPC) asütsü, iba ya 04-10 July, 2026 nung osangkakettem nung sangdonga liasü aser application agütsütsü atema tatembangbuba anogoji 31.07.2026 liasü. Ajisüaka mapang atsülangja applications agizüktsü atema tatembangbuba anogoji October 31, 2026 (atsülangba anogo) tashi asütsü ta sangdonger. Application ji prescribed format nung asütsüla aser ibaji Cadre Controlling Authority ajanga Deputy Secretary (Training), Department of Rural Development, Room No. 16, (5A) 2nd Floor, Lodhi Road, New Delhi-110003 nem agütsütsüla.

Osang tejangja atema iba websites nung reprangang: <https://rural.gov.in> aser <https://dord.gov.in> or www.nird.org.in

TATEMBANGBUBA ANOGO : 31 October, 2026 (atsülangba anogo).

Adv. No. 02/2026 (K-15017/01/2026-Trg.Part (397022))

(Pradeep Kumar)

CBC : 35101/11/0007/2627

Deputy Secretary to the Govt. of India



TIR YIMYIM YIMOBILEM (EDITORIAL)

DIMAPUR THURSDAY, SEPTEMBER (RONGJUI) 24, 2026

Nisung shinga mekazütsüla !

Nisung shiba südir sang, tanur tain mesüra tetsür tebur, tazünger mazünger kecha mali, anema ali tashibo shinga mapa meinyaki mekazütsüla, kechiyong kecha meinyaki temang anisüngzükdaktsüba temang asoshia majung, kechiyong temang ya arakzüa mapa inyaka alitsü asoshi yangluba taküm ka lir. Aji oda, nisung temang ya mapa inyaksü yangluba machine-ang ka mesük, anungji mapa inyaksü yangluba machine ka kecha meinyakdaktsü yura song agi chireptsü. Iba amaji Tsüngirmi nisung ya alima nung arakzüka mapa inyaka alitsü asoshi yanglu, anungji auyaba, nüktapangtaba, nisung tepsetba aser tiyazü jembibatemang Tsüngrem tsüngdang tai masü saka anema lir ser nung mapa meinyaki kazüba Tsüngrem tsüngdangbo kasasa tai asütsü. Aji oda, nisung ka mapa meinyaki kazüba tebilemtsüji pai mesüra lai tangar yaritsü melen pa mesüra lajiang tangar nem yaridaktsür akümer. Tanü asen kidang, asen yimtak, asen alidak, asen loktiliba nung nisung aika mapa meinyaki kazüba angur, item nübo aser mapangji tapayutsüka. Parnokji temang anema dang lir, tenük telen shitak lir aser talangka mazüngyonga azüng zülu meteta lir aser ano karbo talangka zünger odang kidangmongertema lir. Tanü asen lima sensakba aser takoksa anguba ya, shitakba agibo, alima sensakba agi masü mesüra nisung tamajungertem aliba agia masü saka asenok rongnung mapa inyakertem dang nungi mapa meinyakertemang teimba asüba agi temesü makok asenoksasa asenok timtem atemer. Joko, tanübo mapa inyaksü atema academic degree aika ngua talangka azüngtsü menügdaker, kechiyong degree agi masü saka teka aser tokolok agidang inyaksü, anungji arishi tatsüka nung ya küm aika tazüngba nung meindoki pei jangraba, pei akokba aser nisungtem nüngdakba mapatem reprangteta inyak tajungba. Asenoki jungjunga bilemdangra, asenok taküm ya arishi küm 100 alir aser arishi küm 100 aliyonga, arishi küm 20 tashibo tanur ta züngshir aser arishi küm 70 jungerbo tambur ta züngshir, anungji asenok arishia küm 100 alinunga shitakba mapa inyaka alitsübo küm 50 dang adoker. Ajisüaka, asenok küm 40 junga kecha meinyaki kidang dang tangar nem mesüdakja kazüra, na mapa inyaksüba arishi küm 30 dang anünger. Ano, nisung karbo arishi küm 60 jungerbo mapa meinyakteti akümer, anungji item asoshibo mapa inyaksüba kümji 20 dang anünger. Ajisüaka, ano asenoki jungjunga bilemdangra, asenok aika arishi küm noklang junga malitsü. Aji oda, asenok aikati arishi küm 80 a anarongdena tongteter, anungji arishi küm 80 alirtem atemabo, anema aliyonga mapa inyaksüba mapangji tatsüka dang adoker. Kodang asenoki itemji jungjunga angatetdir, asenoki nüngdak maka nung, naroküm kisüng atema, post graduate mesüra doctorate tashi zünga mekazütsü aser government mapa manguyonga aser mapa tulu metenzüktetyonga, kecha meinyaki kazütsübo temulung agi maremtsü. Iba ama taküm jenjang aser arishi mapang angateta, talisa lanurtemi tangar kati pei inyaksüba mapa ka bushia bener arutsütsü amato bilema matai, jet ta pei akok mapa tilaka asüyonga tenzüka adoktsüla. Atangji, kecha meinyaki kazüba nisungji azümasenba agi kazürbo masütsüa akok, saka pai mapa mereprangteter aser mapiteter, anungji teinyaksü mapa maka kazür asütsüa akok. Item jagi Tsüngrem dang mapa inyaksü tasa 'idea' meshitsüla aser medemer mesüra taintem den shisalemsateptsüla, idangji memetetika mapa inyaksüba lenmang kabosa lapoka angutsü. Tanü putu nungbo shingaia mapa aser mapang tajung aru matatsüla saka mapa aser mapang tajungji peisasa yanglutettsüla. Ibaji, ashiko, kidang kiset shiruru kar mesüa anepaluba nungi tenzüksüa akok, mesüra aonsutsü lu ayimba nungi tenzüksüa akok, mesüra chiyongtsü ka yanglua ayok tenzüka nungi asütsüa akok mesüra online business lenmang ka yanglua tenzüka nungi asütsüa akok. Koba südir sang, mapa dang süra ojang, mapa tulu tila ta masü, mapa inyaksüla aser mapa inyakra asen nüngdak ajak yang nung jagi arutsü aser asen nüngdak peria lira, asenoki tangara yaritettsü.

OLEMSABANG

AO OSHI TAMENTAKDAK ASER LIRUMEDEM

~ Mr. I. Temjen Tzüdir (Source : Nokinketer)

(Yashi adok nungi...)

Süra tanü asenokia, asen tütsüteboutem Lungtrok Ongtrok aser Jungliyimti lima nungji kechi oshisa jembir alitsü amai bilemer? Parnok mapang jembiba otsü aser ken atenba ajanga angatetba agi parnoki Jungli aser Mongsen oshi anaprongla jembia sobaliba-a aruba ken aser otsü ajanga angateter. Ano asen tütsüteboutemi atenba ken nung aliba ojangtem ajak ya Mongsen oshi kija-a masü aser jungli oshi kija-a masü ta asüba ojangosü aika angur. Anungji itemjibo "keno oshi" tetezü ken indang oshi ta asenoki ashitsü akok.

Ao Oshi Tamentakdak: Otsüla aser oboula nunger Jungliyimti nungi arur tesem balala nung lia asen oshioben tejembibo jembia aruaka tanü ama zülu kecha maka talangka lir talisa 1878 nungi asen oshi ya zülu wadangi ai. Ano zülu wadangi iaka Dr. E. W. Clark aser tebuttsü tena koba zülujang (script) agitsü kanga shisadanga arur (Assamese/ Hindi/ Bengali/ Urdu item rongnung ka agitsüa bilemdang südi?) asen nübur olaosü den apert Roman zülujang (Alphabet) agitsü Missionary-tem Mungdang Tura nung, Aenjeti 14, 1893 alidang lemtet. Saka yangjia ano "Ü" atema tebilemtsü liasü. Anungji Dr. Clark-i V zülu kübok tajento (dot) ka enoka "Ü" melena amshidang, saka iba jagia mabensatet nung Dr. Clark aser Missionary-temi German zülu ümlaut nungi asen Ao oshi asoshia "Ü" agizüka nüngdakba kaketkeno ajak nung amshia aru. Kodang iba "Ü" ya asen oshi nung enoka amshi, asenbo ABCD zülujang metsürtenet (27) küma tanü tashi yamaji amshia arudagi, kechiaser tetenzük nungi asen oshi züludang "Ü" ya melira mabensa ta ajitet nung missionary-temi aji oda purapiteta amshiba ajanga asen oshioben tali tabensaba kümdaktsü. Kodang nungi asen oshi zülu wadangi ai, tetenzükdak nüburtemji Jungli oshi jembirtem asünung asen kaketkeno ajak Jungli o nung zülua yamaji amshir. Hau, tang Aor rongnung Jungli o, Mongsen o, Changki o aser Nokpo oshi ta jembirtem lir. item ajak ya asen Aor oshi. Oshi kaji kodang tejembi dang jembidir melamela sama-a aotsü lenmang lir. Yamaji asen oshi tejembi dang jembia alidang Dr. Clark, tebuttsü Mary Mead aser Assamese nisung Gudhula Brown nungeri Süpongmeren teyari agia asen oshi ya renloktsü merang. Yamaji arur Molung nunger Edijungba, Süpongmeba, Aokilep aser Imnasama nungeri missionary-tem den yaritepa asen oshi renloka aoba otsü tejangja angutsü.

Asenoki asen Ao oshi tamentakdak tongtibang kar reprangdangra, oshi ka tamentakdak sayutsü asoshi inakyim kar ajanga temelaba angatettsü anungji yangi ni tongtibang ta bilemba kar tatsütsü agi rasatsü merangdi.

Yim akümdang kechi oshi jembiri anir yimji aküm?: Yimtsüng ka asoshibo ibai kanga tongtibang saka reprangdanga ora oshi yabo tamentakdak ka lir aser ibaji nübur shirnoki oshi kaji meima nentaka jembir aser bushir iba dakji dang tuluka amentaka lir.

Tat. agi Mongseneri anir yimji kümaka, iba yimtsüng nungji mongsen o mejembiba yim-a lir. Ano Jungliri anir yim kaji kümaka iba yim nungji jungli oshibo mejembiba yim-a lir. Anungji asen oshi tamentakdakji otsüba masü saka oshi kaji lisopuri pei oshiji koda ketasena nentaka jembir aser amshir iba dakji tuluka keta lir.

Sobusolemtsü (attire): Asen oshioben ya asen sobusolemtsü nunga amentaka lir. Sobusolemtsü ajanga kin ka shisanger, tetsür tebur bendangteter, tensa mapang bendangtsüteter mesüra metetdaktsür. Ano kaketriju nung balaka sobusolemtsü sentsü kasa (uniform) sobuba ajanga tulu tila, takar sensaker aser nisung tsüngda mebendangi ka ama kümdaktsür. Tanü putui-a iba sobusolemtsü ya amshir, saka talisa akhi asen tütsüteboutem sobusolemtsü ajanga asen oshioben tamentakdak sayuba kulitem angutsü. Sobusolemtsü nungji nüngja balala aser item shia tetezü aser meraket balala sayur, yamaji item nüngja nungji asen oshioben amentaker aru. Akhi asen tütsütebou sobusolemtsü ajanga asen sobaliru aser oshioben jangjadaktsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Zion Church nungi lenir 8 tepuokdak nungi chioktsü mepishir



September 23, 2026: China yimtiba, Beijing nung aliba underground Arogo, Zion Church nungi lenir parnok 8 tang tashi tepuokdak lir; China Tir Xi Jinping aser US Tir Donald Trump na senden amentsü mapang ana nung lia meimchir temeden atema inyakba telok kati parnok ajak tepuokdak nungi chioktsü mepishir.

Ita ana tejaklen iba Arogo nung pastor, Ezra Jin bo chioka liasü.

Yaküm October ita nung China ketdangsertemi iba Arogo mita aoba mapang nung nisung 18 pua liasü aser parnok 8 bo tang tashi mechiok.

Iba Arogo nung lenirtemi ozüng alema information networks amshir, ozüng alema business inyaker aser online ajanga tekülem sentong agir, ta ketdangsertemi tai tongloksü.

Tan hopta US Tir Trump aser China Tir Xi na senden amentsü lia Fortify Rights teloki Arogo nung lenirtemji chiokang ta mepishi.

Kinüngertemi kuli

agütsüba nung ajemdaker Fortify Rights teloki tepuokdak Arogo nung lenirtemji reshikangshir, ta metetdaksü.

Pastor Gao Yingjia kinüngtsü, Geng Pengpeng-i, pa kinüngbu puoka aliba Beihali Detention Centres ji kangasa majung, iba Centre nung 40 square meters takdang nung nisung 30 dak tali puoka lir, ta metetdaksü.

Pengpeng-i, "Süng tesa agi yangluba menden yuja lir, yipten süoshi mali, atem kanga memerük aser mesen den merla kanga lir. Nisung tali puokba ajanga parnok kanga mejeptepa mejanger. Mopung tajung mali, air-condition mali aser kanga tatsük. Tepuokdak alirtem tsüngda tashidak menateper," ta metetdaksü.

Laisa, "Tepuokdak chiyungtsü kanga mejungi agütsür, aonsotsü meshidoki agütsür aser chiyungtsü tera dang agütsür. Parnok nem mozü shidak magütsür. Tepuokdak kü kinüngbu appendix timtem ajanga tera

agi dang masü. Pa temang metaa shirangba mapang nunga medical teyari shidak magütsür," ta metetdaksü.

Pastor Yang Jun-i, "Tepuokdak kü kinüngtsü Wu Qiuyu dak azüker. Aonung la tanüker ama nokdakdaksür aser menden nung mapang talanglang nokdakdaksür," ta ashi.

Fortify Rights senior director Benedict Rogers-i, "Zion Church nung lenir ti maneni tepuokdak yur reshikangshir; iba ya yimsü temeden anema lir," ta metetdaksü.

Paisa, "Tir Trump-i May ita nung Beijing semdangba sülen China ketdangsertemi Pastor Jin chiokogo. Tan hopta Xi Jinping-i Washington DC semdangba mapang nung US ketdangsertemi Zion Church nung lenirtem chioktsü atema jembitsüla. Alima linüktemi tangsa Zion Arogo nung lenirtem chioktsü aser parnok anema benoka aliba ken o ajak agientsü atema akhangtsüla," ta metetdaksü.

Sri Lanka nung Khristantemi court obendang pelaa agizüker

September 23, 2026: 2019 küm Sri Lanka nung Easter Sunday anogo nung Islamic kiralongrartemi bomb amshia Tenla ki ana den hotel asem amakba ken o nung Sri Lanka nung court kati nisung 15 aitsüogo.

2019 küm bomb amshia amakdang nisung 270 dak tali asü aser nisung 500 dak tali yirua liasü.

September 22, 2026 nü High Court-i nisung 15 aitsü, nisung 9 maitsü aser iba ken o metembangdang kabo tepuokdak lia süadokogo.

Sri Lanka nung Roman Catholic Arogoi court

obendangji pelaa agizükogo.

Colombo nung aliba St Anthony Arogo nung putir, Jude Fernando-i, "Tatemsas asenok nem ochi obendang agütsüogo. Iba obendang angutsü atema mapang talangka agiogo," ta ashi.

2019 küm bomb amshia amakba Arogo ana rongnung St Anthony Arogo-a densema liasü.

Iba ken o dak sendakba nung 2021 küm melung melemteti alirtem anema ken o 23,270 benoka liasü, aser item rongnung nisung tepsetba, kiralongratsü atema asalentong yangluba aser raraba hadir

amshiba densema lir.

Iba lendong nung asürtemji teimbaka Sri Lanka nungertem liasü. Iba lendong nung British nung 8 densema bendanger 45 asü.

Tesüiba küm tenet tashi Sri Lanka nung Khristantemi ochi temeden agüjang ta takhangba agüja aruogo.

Pei mapa nung tamakok aludaktsüba atema taoba hopta tesüiba mapang ketdangser ana nem tasüba temerenshi obendang agüja liasü, ajisüaka iba linük nung aiben temerenshi ajemja taküm piyong tepuokdak ayutsü yimli sayur.

ANO GO ABEN TSÜNGREM DEN

Lanurtem Khrista asoshi

*Tebenjem mapang ne Teyanglur bilemtetang.
Sayutsüngir 12:1*

Asen Teyangluri Pa yimli lanurtem tenzükba jenjang tulu nung yutsü. Tamaren Ejip yimli nung Yosef küm 30 alidang Prime Minister aser chiyungtsü nung ketdangsur aküm. Israel nung yimtenren mesüngjemteti aliba mapang asangur Samuel tanishir aküm. Asangur Dawidi Filista nung nokinketer Goliat tepset. Pauli asangur Timoti Efesa arogo achaayangtsü toktsü, aser shingaia mezungmeshi mesüdaktsü saka o nung, taküm yimya nung, temeim nung, tamang nung aser temerukba nung tamanger tsüngdang tatishitsü ka liang ta zülü! (1 Timoti 4: 12).

Ano tamang katetba tetsür aiür, Ruth indang asenoki 'Laishiba nung angur. Ruth aiür amitsür ka liasü. Lai Tsüngrem dak amangba tamang aser Tsungremer nübur dang bendanga agüja meimba sayur. Tobur tajung Esteri pei pur tesamatsüba nungi kümzüktsü nok-o-nü ama amshi. Tsüngrem yimli yangertsü asoshi lanur aika Tsüngremi amshi.

Tsüngremi maneni jangrabangra, tasü tait, tarernzük aser tenendak lanurtem Pa yimli nung amshiner. Tang, shibai Kibuba asoshi meshiteta bendanga agütsütsü? (I Putipuyang 29:5).

Taoba mapang Open Doors CEO, Eddie Lyle süogo



September 23, 2026: Open Doors UK & Ireland nung taoba mapang chief executive officer aser Tir, Eddie Lyle süogo; pa arrshi küm 73 liasü.

Lyle ya Northern Ireland nung aso aser asangwa mapang Khristan aküm. Pa Youth for Christ aser Release International (tangbo Voice of Persecuted Christians) nunga inyakogo.

2005 küm pa Open Doors telok nung adenba sülen pa kinüngtsü Christine tenaprongla iba charity telok nung küm 20 tashi inyakogo.

Honibarnü (September 19) Oxford nung par kibong züngsemtem aser medemertem lia pa asü. Pa temelungjang surgery agiba sülen timtem adoka asü.

Pai pa kinüngtsü den par jabaso Adam toktsür pilar.

Tesüiba küm aika pai Khristantemi reshikangshi ajangshiba linük aika sema senzüogo. Pai Vietnam nung underground churches nungi tenzuka Nigeria nung refugee camps aika semogo.

Pa UK aser Ireland-i meyipa aruba sülen pai

Arogotem dang Khristantem reshikangshiba linüktem nung pai kuli süa anguba lemsatepa aruogo.

Hombarnü Open Doors-i, "Pa dak angatsü, Laishiba sayutsü aser otsü ashitsü sempet liasü. Pai ajuruba nisung ajak den pai Khrista temeim lemsatepa liasü," ta metetdaksü.

Lyle-i Medic International-a tenteta reshikangshi aliba tesemtem nung nüburtem nem medical teyari agütsü, North-East Ukraine nung Khristan missions nungita yari aser coaching consultancy Springbrook Partnership tenteta liasü.

Open Doors UK & Ireland CEO, Tiffany Barrans-i, "Eddie ya chief executive mesüra Tir dang masü aika atema medemer tajung ka aser tesayur ka liasü. Pa tetangshi liasü, pa dak temeim, shisatsü, mangdang aser asayamenü sempet liasü. UK & Ireland aser alima tesem balala nung ministry tang iba jenjang nung aliba ya Eddie ajanga lir. Pa kanga menungratsü aser bilemtettsü," ta metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Hadiangden**

(n) renemkonem (Preparation)

* Nisung karbo sentepi aotsüba hadiangden dang mapang tali endoker.

Hongperiang

(adj) onsara tongmelang (too simple)

* Mapa nung hongperiang majung.



Tir Yimyim

OLONG PAITEP # 7659

1				2				3		4
5		6								
							7			
8										
										9
		10				11				
				12				13		
14										
						15				
16										

TIPIEN

2. Auonung chiyongsü asenba

-(7)

5. Mangyimba mapang

-(5)

7. O tamendakdak

-(4)

8. Peidak malangba

-(7)

10. Juli

-(7)

12. Sen ayudak

-(7)

14. Tenük agi ajitet

-(4)

15. Tamajung aküm

-(5)

16. Apuso

-(7)

LANGTSÜNGLEN

1. Lenmang

-(7)

2. Aor kidong ka tenüing

-(6)

3. Tenarong maten

-(6)

4. A _ _ _ g

-(3)

6. Mopung apodoka

-

ola adokdaksüba

-(3)

9. Tongtipang tagitsü

-(7)

10. Menungra bilem

-(6)

11. Aiür

-(6)

13. S _ _ _ k

-(3)

14. T _ _ _ r

-(3)

OLONG PAITEP # 7658 TELANGZÜBA**TIPIEN :**

1. Yiar, 3. Tesola, 7. Yimra,

8. Tangar, 9. Peria, 10. Tanur,

11. Tasen, 13. Lemjem, 15. Tambu,

16. Khuret, 17. Sang.

LANGTSÜNGLEN :

1. Yimti, 2. Amen, 4. Shiner,

5. Alaka, 6. Satan, 9. Putet,

10. Tembar, 11. Tatok, 12. Amang,

14. Jala.

NAI-A YA METETTER

China nunger arishi küm 6 tain tanur tetsür kati 3x3 Rubik's Cube yanglutetba atema alima otsü tasen ka yangluogo. Young speedcuber Lian Yunzhi-i seconds 4 nung dang 3x3 Rubik's Cube yangluteta women's world record ajatetogo. Lian Yunzhi-i punguben tashi Rubik's Cube yanglu aser ibaji 4.52 aser 4.27 seconds nung dang yangluteta liasü.

Assam-Nagaland arrtsülen gecko lizards 86 kümzükogo

Jorhat, September 23, 2026

(Agencies): Assam-Nagaland arrtsü adena gecko lizards 86 tashi shibelenba kümzükogo aser

iba dak sendakba nung Assam kübok Jorhat district nung nisung ana puogo.

Mariani Forest Range Office

kübok Bandarchalia nung Directorate of Revenue Intelligence (DRI) telok kati iba mapa inyak.

Shiruru shibelener ana ya Namrupia Jungle Block nung alir Raju Kaitha aser Nagaland kübok Akahetu nunger Anatu Watsa na ta jangaogo.

Tenati gecko lizards ya miima yokdoktsü atema bener aodang apu aser tena den gecko lizards ajak Mariani Forest Range Office ket nung agütsüogo.

Forest ketdangsürtemi gecko lizards kong nungi angu aser kong yokdoktsüba liasü ta asüba bushisüngdang südar.

Adi teloki 11,000-MW Siang project meinyaktsü tuyur

Itanagar, September 23, 2026

(Agencies): Arunachal Pradesh nung Adi nunger asoshi tematiba telok Adi Bane Kebang-United (ABK-U)-i state sorkar dang Siang Upper Multipurpose Project (SUMP) agientsü metetdaksüogo.

Iba mapatong ajanga nisungtem pei talidak toktür aotsüsa akümtsü, tzü-mopung raksatsü aser ancestral land & cultural heritage nung kongshitsü ta ABK-U-i ashi.

"Adi nunger aliba tesemtem nung mega storage project magizüker aser sorkar dang mapatong ka inyaknüba atema dangbo "national interest" mebenoktsü ayongzüker" ta ABK-U president Thomas Borang-i ashi.

Upper Siang kübok Geku

nung September 16 nü Adi nunger senden ka amendang SUMP proposal agientsü atema onük pezü aliba bangzüng renemogo ta ABK-U-i ashi.

Parnoki iba mapatong indang pre-feasibility report (PFR) renemba dak sendakba tenangzüktep balala agientsü, Siang aser Upper Siang district tem nung security forces talila lemzüka aliba meyipa agientsü aser iba mapatong anema noktakba yong village heads anenja aliba tanaben shimshitsü takhangba agütsüogo.

Iba SUMP ya 11,000 MW tashi asütsü aser hydropower generation o water management den Siang ayong dak sendakba water security atema yanglutsü tebilemba lir.

ABK-U-i Chief Minister Pema Khandu dangi züluba shidi ka nung PFR dak sendakba maparen ajak anentsü aser lisopurtem dang nungi temelaba melii iba mapatong ya meinyaktsü metetdaksüogo.

Külen, state sorkari iba mapatong ya linük asoshi tongtipang lir aser lisopurtem anioktsüla ta ashir.

"Sorkari olemteptsü mulunga lir anungji nübortemi iba mapatong dak sendakba atema ketdangpurtem den ajurutepa jangiateptsü ayongzüker" ta Chief Minister Pema Khandu-i Hombarnü ashi.

"Tatem nungbo iba ya national project ka lir saka kiburji public lir. Parnok ya ali kibur lir. Parnok iba mapatong nung anioktsüla" ta pai ashi.



GOVT. OF NAGALAND
**WOMEN RESOURCE
DEVELOPMENT
SPONSORED
TRAINING PROGRAMME**

A 3-month Training Course on
Aviation, Cruise Line & Hospitality
from 5th October, 2026

Skill Today
**BRIGHTER
TOMORROW**
SKILL • CONFIDENCE • INDEPENDENCE

**100% SPONSORED
RESIDENTIAL TRAINING**

for a brighter, independent you!

TRAINING COURSES**AVIATION**

Cabin Crew, Ground Staff, Customer Service & Airport Operations

1



Age

: 18 - 27 years

2



Qualifications

: Class 12 Pass and Above

3



Minimum Height

: 155 cm

4



No Visible Scars/Tattoos

**HOSPITALITY**

Front Office, Housekeeping, Food & Beverage Service

1



Age

: 18 - 30 years

2



Qualifications

: Class 10 Pass & Above

**CRUISE LINE**

Hospitality & Customer Service for Global Careers

!

Only for female candidates
who are indigenous inhabitants
of Nagaland

Your Skills
Our Support
A Stronger Nagaland

SPONSORED
TRAINING &
STUDY MATERIALSINDUSTRY
RECOGNIZED
CERTIFICATIONPLACEMENT
ASSISTANCE
IN INDIA & ABROAD

**Funded under the
TRANSFORMATIVE LIVELIHOOD
INTERVENTION PROJECT
DEPT. OF WOMEN RESOURCE DEVELOPMENT**

FOR REGISTRATION & ENQUIRIES

8787343247

Training Location: Dimapur

Last Date of Registration: Wednesday, 30th September, 2026

EMPOWERING WOMEN
BUILDING A STRONGER NAGALAND

LIMITED



SEAT

June ita sülen tang mezüngbuba US aser Iran jembishinü aka

New York, Rongjui/Sept. 23 (Agencies): Rara nung tangatettep kati marura Islamic Republic samatsütsü ta US Tir Donald Trump-i ashiba anogo New York nung UN senden alidang Iran aser US ketdangsürtem ajurutepa jembishinü kaogo.

Qatar-i achayanga ayongzükbaba senden nung telemtetba kecha magitet, kong Iran indang foreign minister aser US Tir Donald Trump indang envoy Steve Witkoff dena liasü - koba June ita ceasefire raksaba sülen tang mezüngbuba senden amenba alitsü.

Wiktoff-i sensaksem ka tembangogo aser ibaji ajanga tajangzük alitsü imlar, ta ashi. Iran-i US dang tashiyim amshiba mapa tembangtsü akhangba nenshia liasü.

US aser Israel nati February 28 nü tayimtsü amshia Iran dak amak tenzük. Iran-i langzúa Israel aser Gulf nung US mitkar aliba tesemtem nung maka Strait of Hormuz mokdang.

Rara metenzükdang aliba nung totzü aser liquefied natural gas shilem 20 shi strait ya ajanga

benali aser iba tongtipang tzü lenmang shibangba ajanga totzü jenjang tali akum.

Iba rara tembangtsü asoshi lenmang bushitsü atema Trump tebilemtsü akar aser talisa US nung November ita Congressional elections agitsü lir.

Mongulbarnü New York nung UN General Assembly nung Trump-i rongsenketzüng, immigration, arütsü aser mapa tamajung inyakba azüokba nung takok anguba indang jembia tenzük, koba alima ajunga nungi lenirtem adenshia alidak jembir masü election nübuyim o ama angatet.

Pai iba senden nung jembiba talangba len Iran den raraba temeden ang jembia - koba UN Secretary General António Guterres-i alima telemsa tali tamajungba akumer ta ashiba den khenyongi mapet liasü.

Iba rara ajanga Tehran-i nuclear nok-nü yanglutsü aliba nokdangtet aser tezüngzüktep mesüra atsüanem ajanga masü saka tashi ajanga yimjung indang jenjang sayutetogo, ta US tiri ashi.

(Maneni tapak 8 nung...)

US, Greenland aser Denmark tezüngzüktep ka yangluogo

United Nations, Rongjui/Sept. 23 (Agencies): US Tir Donald Trump aser Greenland o Denmark nungi lenirtem Mongulbarnü tezüngzüktep ka zülutepogo, koba ajanga Greenland nung US mitkar timba alitsü melar aser iba tongtipang tesem aser ali rongsen jenti aliba asetkong mechi mangatettep aliba bentettsü akok.

Iba agreement ya Trump-i New York nung UN General Assembly semdangba mapang zülutepa liasü, kong Trump-i Arctic nung Russia aser China nung tali akumba den tokteptsü asoshi Greenland ya US litsü ka ama agitsü akhangba nokdang.

Ajisüaka iba tezüngzüktep yagi rer agi sünga aliba territory nung US mitkar tali amenoka alitsü melar, koba Greenland lenirtemi US nem okshia magidaktsütsü mechi inyaktsü asoshi jembia liasü.

Ballistic missile nungi jong ama kumzüka ayutsü mechi US-i Greenland nung "Golden Dome" defense system ka amenoktsü tezüngzüktep nung shia lir. Europe nungi North America-i aotsü lenmang

tatsütiba ya Arctic island ajanga lir, kong northernmost US military base lir.

Iba tezüngzüktep nung meyongnem magütsüdang UN nung alima lenirtem adenshia alidak jembidang, iba agreement yagi US nem iba territory indang security aser tanga nüngdakba ajak agütsütsü teti asoshi melar, ta Trump-i ashi.

"US tsükchir shinga indang mitkar Greenland nung amenoka alitsü memelatsü mesüra onoki mela tezüluba nung magütsüi 'sensitive investments' mesütettsü," ta ashi.

Trump-i UN nung jembiba sülen sentong ka ayongzüka iba tezüngzüktep nung Trump, Danish Ato Kilonser Mette Frederiksen aser Greenland Ato Kilonser Jens-Frederik Nielsen nungeri meyongnem agüja liasü.

Frederiksen-i iba tezüngzüktep ya tatem maka alitsü ta ashi aser NATO alliance ya tongtipang lir aser Greenland pei sasa yimsü asütsü temeden akhumtsübobaba lir ta ashi.

Nielsen-i Arctic region nung NATO ya tongtipang lir ta ashi. "NATO tashi ita alitsü aser Arctic nunga tashi ita alitsü ibai

tongtipang ta onoki amanger, kong alliance-i tongti shilem agitsü lir," ta pai ashi.

Trump-i tashiyim amshia iba asetkong agitsü ta amokmerenba ajanga Greenland aser Denmark den tesendaktep mejungi akum.

Greenland ya taoba mapang Kingdom of Denmark indang colony ka liasü aser tang semi-autonomous territory ka lir, koba Arctic aser North America tsünga lir aser energy resources aika lir.

Greenland northwest tsütsü meta tezülen US-i Pituffik Space Base amenoka lir. Tezüngzüktep yagi military sites ana lapoktsür: Narsarsuaq, taoba mapang Cold War airbase, kong nütsüng ajema kumogo, aser Mestersvig, tang Danish special forces unit Sirius Dog Sled Patrol-i amshir.

"Onoki tekeratiba nung tapet tesem nung mitkar jenti alitsü asoshi maparen tenzüktsü. Onoki military bases kanga tulu ana yanglutsü," ta Trump-i UN nung jembidang ashi.

Ajisüaka iba tezüngzüktep ya Denmark aser Greenland indang parliaments nung agizüktsü nüngdaker.

Russia den "energy ceasefire" ka atema Ukraine renema lir: Zelenskyy



Kyiv, Rongjui/September 23 (Agencies): Ukraine tir Volodymyr Zelenskyy-i ashiba agi, Russia den bilateral "energy ceasefire" ka atema Kyiv maneni renema lir. United States aser United Kingdom nung lenirtem den New York nung sensaksem akaba sülen pai iba olen lemsatet.

Paisa, Mongolbarnü Telegram nung post ka ajanga, Ukraine kanga sashia amaktsü atema Russia renemdar, ta ashi.

Zelenskyy, shiba United Nations General Assembly atema New York-i oa liasü, pa US tir Donald Trump den minute 40 sensak asem, aser ashiba agi, sensaksem ya Russia-i linük amakba dak

rangloker agia liasü. X ajanga pai, sensaksem kanga takok ngua kaogo ta ashi.

"US aser Ukraine napronglai Russia-i menaba rara ya asükwa m e t e n z ü k d a n g s a tembangdaktsüner. Onoki rara anendaktsütsü atema jenjang koma agi nung ajungtsü iba dak sendakba nung sensaksemogo aser iba ajanga diplomacy atema lenmang lapoktsütsü akok," ta pai shisem.

UN headquarters nung osangbenertem tasüngdangba langzüba mapang Zelenskyy-i, Moscow-i Ukraine indang energy system tem amakba anenra Russia indang energy facility tem amakba anentsü atema Kyiv renema lir, ta

langzü. Ajisüaka pai, Kyiv kijai Russia indang oil industry amakba anentsü atema Trump den sensak masem, ta ashi.

"Energy ceasefire atema onok renema lir. "Parnoki onok nem parnok indang diesel aser refinery tem memakdaksünüra onok renema lir, ajisüaka parnokia onok indang energy system, electricity, heating system, water supply tem mamaktsüla," ta pai ashi.

November ita US midterm elections magi tsünga petrol jenjang kanga aika akümba ajanga Trump, shiba indang approval ratings kanga ajema kümogo, pai tawa Ukraine-i drone agi Russia indang totzü asüngtetdak kanga mejungi raksatsüba ajanga alima ajunga nung diesel jenjang timba kümogo, ta ashi.

Senden mamen tsünga Trump-i osangbenertem dang pa aser Zelenskyy nati Ukraine-i totzü asüngtetdak balala amakba sensak asemtsü, ta shir liasü.

"Iba ya Russia asoshi takoksa tulu lir. Iba ajanga diesel jenjang dak kanga mejungi kongshiogo," ta Trump-i ashi.

Paisa, tenati rara tembangdaktsütsü atema lenmang bushitsü asoshi sensak asemtsü, ta ashi. "Rara ya anentsü ta amanger," ta paisa shisem.

US tir-i taoba hopta ashiba

agi, linük ana yagi kati ka indang energy facility tem amakba anentsü mulungtepogo. Ajisüaka mapang tatsüka dang lir energy facility tem amak tenzüktepa liasü.

US-i energy moratorium ka atema benokba Kremlin-i agizükogo, aser iba den tzüyim ajanga Russia-i totzü export asüba aser tenokdangba balala agütsür aliba tepungbaba kümdaktsütsü atema jenjang agitsü ayongzüka liasü.

Ajisüaka UK Ato Kilonser Andy Burnham den ajurutebpa sülen Zelenskyy-i Telegram ajanga ashiba agi, Ukraine nungertem anogoshia missile aser drone tem agi amokmerenba mapang Russia nem tenokdangba agütsür aliba agintsü yabo tamakoktsü.

Linük anapronglai hopta ishi ka kati ka indang energy facility tem maktepba sülen tang energy ceasefire ka atema jembishinüdar. Russia-i Ukraine indang power, totzü aser rongnendak infrastructure tem kanga atonga makdar, aser iba ajanga asükwa aruba mapang linük indang energy system tamajungba küma raksatsütsü ta tsübua bilemer.

September 15 nü Russia-i drone 200 shi yoka Ukraine kübok tesem balala makogo. Ukraine nung ketdangsürtemi ashiba agi, iba mapang Kyiv nung petrol

station tem aser tangalen energy aser rongnendak infrastructure tem raksaja liasü.

Kasa mapang nung Ukraine-ia, long-range drone tem amshia Russia nung totzü asüngtetdak balala aser Ukraine arrtsü nungi km 3,000 tashi pilar amenoka aliba energy facility tem maka arudar. September 20 nü Moscow totzü asüngtetdak amakba sülen inyakyim anena atatsüsa aküm. Iba facility nung ya 2024 kumbo anogo nung totzü 230,000 barrel asüngteta liasü.

Russia-i, asükwa tonga aruba mapang Ukraine indang heating aser power facility tem amaktsü ta tsübutepa aliba mapang Zelenskyy-i ashiba agi, pai Trump den winter air-defence package ka atema sensaksemogo aser Patriot air defence missiles talila meshiogo. Iba missile yagidang Russia indang ballistic missile tem khadangteter.

US-Israel nati Iran amakba den Russia aser Ukraine na raraba ajanga Patriots missile supply dak kongshiogo.

Zelenskyy-i ashiba agi, taküm asükwa US-i Patriots missile tem agütsüba ya Germany nungi supply anguba sülen meyipa agütsütsü. Germany-i 2027 aser 2028 küm Ukraine nem Patriots missile 600 agütsütsü mulunga agizükogo.

Asian Games: Chanu, tebur skeet team & Meena nungeri medal angu



Mirabai Chanu



Jay Meena

Rongjui/September 23, 2026 (Agencies): India tsürtem rongnungi nungtugu weightlifter Mirabai Chanu-i Bodhbarnü Asian Games nung silver medal ka nguogo. Chanu shibai Olympics densema tongtibang international asayamungtem ajak nung medal ngur lir, lai mapang talangka ataba sülen Asian Games nunga medal ngutetogo.

Küm 28 sülen tang mezüngbuba India-i Asian Games nung weightlifting asaya nung medal ka nguogo. 1998 küm Karnam Malleswari-i tesüsa medal ka ngur liasü.

Chanu-i 49kg category nung ajak senteper 198kg (snatch nung 87kg, clean & jerk nung 111kg) ajungketa silver medal nguogo.

Chanu ya Malleshwari sülen India nunger weightlifter tem rongnung, Olympics, Asian Games, Commonwealth Games, World

Championships, Asian aser Commonwealth Championships densema international weightlifting asayamung ajak nung medal anguba tanabuba asayar kümogo.

Iba asaya nung North Korea tsür Ri Song-gum-i 215kg ajungketa gold medal angu aser Indonesia tsür Luluk Diana Tri Wijayana-i (191kg) bronze medal ngua liasü.

Kasa anogo Anantjeet Singh Naruka, Mairaj Ahmad Khan aser Bhavtegh Singh Gill nungeri tebur skeet team asaya nung bronze medal ka nguogo. Parnok ajak senteper point 346 ngua liasü.

Skeet asaya nung asayar ajaki point 125 angutsü maongka agütsür.

Anantjeet, shiba kija asaya final atema qualify süogo, pai point 119 angu, Mairaj-i point 116 aser Bhavtegh-i point 111 ngua liasü.

Parnok asemi iba medal

mangu tsünga tetsür asaya nung Raiza Dhillon, Maheshwari Chauhan aser Parinaaz Dhaliwal nungeri point 331 ngua bronze medal ngur liasü.

Raiza aser Parinaaz nabo tetsür kija skeet asaya final asaya atema qualify sür lir.

Maneni soft tennis asayar Jay Meena-ia bronze medal ka nguogo. Semifinal asaya nung pa Kurosaka den minute 45 kanga toktepba asaya saka 2-4 (3-5, 1-4, 1-4, 4-1, 6-4, 1-4) agi asaya mekoki liasü.

Meena shiba 2022 National Games gold medallist lir, pai asaya tetenzüklen junga masayatet aser Kurosaka nem asaya azüokdakja mezüngbuba asaya ana kokdaksü. Iba sülen Japan nunger asayar ya 3-1 agi tejakdang aküm, ajisüaka Meena-i asendenshir kanga meranga asaya-a game pezübuba aser pongububa akok, ajisüaka Kurosaka-i game trokbuba koka asaya kokatok.

Yu-i Asian Games nung gold medal 3 angu

Rongjui/September 23, 2026 (Agencies): Arishi küm 13 tain Yu Zidi-i 400m individual medley nung takok anguba sülen tang asaya aliba Asian Games nung gold medal tasembuba nguogo.

China tsür Yu asaya tetenzük nungi tejakdang liasü aser minute pezü 28.56 second nung alizüing atongba sülen lai Games record tasen ka yangluogo. 2014 küm Games record yanglur aliba dang nungi lai second 4.5 shi agi takaraba alizüing tongteta liasü.

Lai alizüing minute pezü 28.56 second nung tongtetba ya taküm alima ajunga nung alizüing takaratiba tongtetba pezübuba asütsü.

Yu ya külem China tsür Ke Wenxi dang nungi second 3.95 agi takaraba liasü, shibai silver medal nguogo. Iba asaya nung Japan tsür Mio Narita-i bronze

medal angu.

200m butterfly aser 200m individual medley nung gold anguba den 400m individual medley nunga gold anguba sülen Yu ya 2028 Los Angeles Olympics nung medal atema tokteptsü purtem rongnung ka ta züingshir.

Kasa asayamung nung North Korea tsür weightlifter Ri Song Gum-i 49kg category nung gold medal anguba mapang world record asem yangluogo. Lai Asian Games nung tang agi tasembubaba gold medal nguogo.

Defending champion Ri-i, snatch nung 94kg aser clean-and-jerk nung 121kg ajungket, koba taoba mapang record yanglur aliba dang nungi kg ka agi timba lir. Ajak senteper lai 215kg ajungket, koba taoba mapang world record dang nungi kg 4 agi timba liasü.

Mark Wood International asaya nungi anisüngzüker



Rongjui/September 23, 2026 (Agencies): England nunger asayar tejen Mark Wood-i Mongolbarnü pa international cricket asaya nungi anisüngzüker sangdongogo. 2015 nungi 2025 küm tashi asayaba mapang arishi küm 36 tain fast bowler ya England team nungi format asemprongla nung asayaogo, aser pa 2019 ICC Men's ODI World Cup akokba team nunga densema liasü.

Pa tatesa England tenüing nungi Australia den 2025-26 Ashes series mezüngbuba Test nung asaya liasü. Iba Test ya Optus Stadium, Perth nung

November 21 aser 22 nü asaya liasü.

Wood England team nungi Test 38, ODI 70 aser T20I 38 nung asayaogo. Iba mapang pai wicket 119, 80 aser 54 agia liasü. Woods-i ashiba agi, pa dang Test aser ODI ojang dang asayatsü atema doctor temi tetuyuba agütsüba sülen international cricket asaya nungi anisüngzüksü telemtetba agiogo.

"Ni international cricket asaya nungi anisüngzüksü atema telemtetba agiogo. Ni asaya nungi anenba ya kecha taoksatsüka masü aser kü indang contract tembangtsü tang mapang tetemsü ta bilemer. Doctor temi tetuyuba agütsüba sülen ni Test aser 50-over cricket asayatsü tamakoktsü kümogo," ta Woord-i ashi.

Pa ya ODI World Cup akokba team nung dang masü saka 2022 küm T20 World Cup akokba Jos Buttler-i aniba England team nunga densema liasü.

St John HSS Mon, St Joseph HSS Viswema nati U-14 Sepaktakraw title benogo



Kohima, Rongjui/September 23 (TYO): State Level 'Catch Them Young' U-14 Sepaktakraw Championship nung St John Higher Secondary School, Mon, aser St Joseph Higher Secondary School, Viswema, Kohima, nati tebur aser tetsür asaya kokogo. Iba asayamung ya Hall B, Indira Gandhi Stadium, Kohima nung asaya koba Bodhbarnü tembangogo.

Teburtem asaya nung Green Valley School, Mon runners-up aser Bethel Baptist Higher Secondary School, Niuland tasembuba nung tembanga liasü. Green Valley HSS, Mon nungi Sangti P nem best player naroküm agütsüogo.

Tetsürtem asaya nung Mungleu Valley School, Peren tanabuba aser St Mary High School, Mon tasembuba nung liasü. St Joseph HSS, Viswema nungi Puangly Riamei nem best player naroküm agütsü.

Iba asayamung ya Department of Youth Resources and Sports-i ayongzüka asaya-a liasü.

Asayamung shibangba sentong nung Secretary, Youth Resources and Sports Department, Anthony Ngullie alakteta jaoker liasü. Pai takok angurtem nem tenüingsang agütsü aser iba asayamung ya tarutsü nung asayamungtem atema tetenzüker ka dang lir, ta ashi.

Pai asayartem dang tejangraba aser temulungtetba tulu nung maneni meranga inyaksü ajungshiba den, alima ya tetoktepba agi sünga lir ta shia parnok dak akaba tajungtiba agüja takok nguyonga aotsü ajungshi.

Ngullie den All Nagaland Private Schools' Association tir Bithungo Kikon aser Director of Youth Resources and Sports Kethosituo Sekhose nungeri takokertem nem sempet agüja liasü.

Asayamung shibangba sentong ya Additional Director, Youth Resources and Sports, Jakedovo Chase lenisüba nung agi aser Joint Director Nyuvitho Nyuthe-i tepela o jembi.

BENDANGLI OSANG : Tapak 7 nungi...

June ita sülen tang mezüngbuba...

"Tesüiba mapang dang nungi tajungba linük yangertsü asoshi Iran den tezüngzüktep ka yanglutsü asü?" ta pai ashi.

"Mesüra ni Islamic Republic ya kanga keraa samatsür tanaben nisung tepseta linük balala raksatsütsü asoshi maongka kodanga magütsütsü? Ni parnok mulumi-i yoktsü asü?"

November ita election sülen Iran den tezüngzüktep ka

yanglutsü südi ta pai amanger, ta Trump-i ashi.

Mapang tatsüka lir osangbener den jembidang, American ketdangsür temi ketdangsürtem den ghonda asem senden tajung ka menogo, ta pai ashi.

Foreign Minister Abbas Araghchi-i Witkoff ajuruba ya Iran state TV ajanga jangjatsüogo.

BILEMDANGANG

"Mapa ya tulu tila ta kecha mali ajak mapa dang. Azümesen meli-i pai akokba inyakang"